

Malaysia perlu falsafah kata Dr. Ling

Bahan asal dari Arkib
Negara Malaysia

BANGI, Isnin — Timbalan Menteri Penerangan, Dr. Ling Liong Sik hari ini berkata, Malaysia perlukan satu falsafah yang membolehkannya meneliti masa depan.

"Kita mahukan satu Malaysia yang aman, progresif dan demokratik. Tetapi impian ini mestilah terkandung dalam satu falsafah yang boleh diterima ramai."

Konsep Rukun Negara, katanya, boleh mencapai hasrat itu dan aspirasi-aspirasi dalam Rukun Negara seolah-olah menyatakan Malaysia sudahpun mempunyai satu objektif komunikasi kebangsaan.

Dr. Ling berucap merasmikan satu seminar mengenai perkembangan kurikulum dan latihan komunikasi di Universiti Kebangsaan Malaysia (UKM) di sini.

Perpaduan

Katanya, peringkat kecekapan serta daya fahaman proses perancangan komunikasi yang dicapai setakat ini mendorong rakyat berfikir sama ada proses tersebut boleh digunakan untuk mencapai perpaduan kebangsaan.

"Kita perlu berfikir sama ada satu dasar kebangsaan atau dasar komunikasi perlu untuk menyatukan masyarakat kita," katanya.

Konsep-konsep dan proses perancangan berdasarkan nilai-nilai tertentu dapat disalurkan kepada pembangunan sosio-ekonomi dengan senang.

"Tetapi apabila kita menghampiri soal perpaduan negara, kita akan sedar konsep-konsep, teori dan proses perancangan tersebut tidaklah mencukupi," kata beliau.

Katanya, Malaysia memerlukan satu dasar untuk menentukan jalan-jalan yang perlu diambil.

Beberapa kertas-kerja dibentangkan di dalam seminar tiga hari anjuran Jabatan Komunikasi UKM dan Persatuan Mahasiswa Universiti itu.